

E aceptacion y uso di Wampum como forma di pago dor di e natibonan norte Armericano sigur a bin si tuma na cuenta e hecho cu nan ta hopi gusta como decoracion na curpa. Metal precioso semper tabata tin un lugar special den historia como decoracion pa curpa y esey lo ta un di e razonnan pakiko ela wordo adopta y adapta como forma di pago den diferente civilisacion y sociedad tanto antiguo como moderno.

Na e islanan Fiji, e sociedad a duna balor grandi na diente di tribon. E diente di tribon tabata y ta hunga un rol grandi den ceremonianan religioso y esey ta motibo pakiko e la haña asina hopi balor te pa hasta nan considere como forma di cambio y te hasta por a wordo usa como pago di bruid. Asina tambe e piedra yama *fei* di isla di Yap tambe tabata tin pomer un balor religioso y ceremonial promer cu e la bira un forma di pago. E piedra di Yap a wordo usa como forma di pago te na 1960 y ta hopi gusta pa coleccionista rond mundo.

Baca tambe por ser describi como forma di pago den cierto civilisacion. E tabata tin un balor halto na Roma antiguo y tabata constitui forma di pago mayor. Pa motibo di e dificultad di transportacion Roma a traha su promer moneda den forma cuadra cu e symbolo du baca. Di e baca e palabra Latino pa placa "Pecuña" a deriva.

Origen di Placa ta bay atras na e sistema di cambio usa den diferente civilisacionnan. Esaki a sosoe te ora cu metal a cuminsa reemplaza e sistema di cambio aki. Esaki tin varios motibo.

Pero pa sigui papia ariba placa primitivo nos mester recorda cu mundo a y ta conose diferente civilisacion. Tur cu diferente cultura, idioma y custumbernan. Curioso ta cu placa primitivo no a origina presisamente pa guia nos economia pero tin otro motibonan y esakinan ta diferente den cada civilisacion. Por ehempel pa paga un famia ora cu casa cu nan yiu muher como tambe pa paga un famia ora cu sacrifica of asesina un familiar.

Na Sur America, Norte America y Africa placa primitivo ta hopi bon documenta pasobra na ta hopi recien. Mundo nobo y Africa a keda pa mas tempo fiel na civilisacion bieuw y tabata hasi poco cambio den sociedad te cu venida di e Europeanonan. Den Europa, Medio Oriente y China placa primitivo ta data for di hopi mas remoto y ta na Medio Oriente cu oro ta hasi su introduccion.

Museo Numismatico Aruba a habri un vitrina dedica na placa primitivo di henter mundo cu nan storia y nos kier invitabo pasa y siña conose nan mas di cerca. Bin admira placa traha di ivory, palo, textil, cabey di rabo di olifante, diente di tribon, kraaltji, cocolishi y hopi mas.

No lubida cu nos propio indigena di e tribo Caquetio a usa un articulo semehante na un boton, cual nan tabata usa como decoration, manera cadena y armband, pa nan haci cambio un cu otro, *o sea un placa primitivo di Aruba.*

Articulo scirbi pa Desiree Croes y Ruben Odor